

**■ COLUMNA**

# Davart la sinestesia

DA BENEDETTO VIGNE

**A**vant intgins onns, tranter Nadal e Bumaun, in'ustaria pittoresca en ina vallada grischna. Vid maisa radunda la bella cumpagnia suenter ina vernissascha d'art. Ins discorra da quai e da tschai. D. St., madrina dad ina famosa scola d'art turitgaisa, menziuna il fenomen numnà sinestesia. I dettia tscherta glied che vesia colurs sch'ella saja confruntada cun bustabs u cifras. In A possia clamar la color melna, in 3 la color blaua, ed uschia vinavant.

**P**recis, conferm jau en in'unda d'euforia, pretendend ch'jau conuschia quest fenomen ord atgna experientscha, betg directamain colurs, mabain ina spezia da cuntrada topografica sa spleghia mintgamai davant mes egl intern, imaginond l'alfabet u bain la retscha da las cifras. Dal 2 e 3 vai pulitamain a munt enfin tar il 4, lura vegn ina pitschna plattform che mussa levamain a bass enfin tar il 6, suenter l'8 vai però puspè stip ad



ault enfin si tar il 10. La cuntrada dals emprims die-schers è lura variantamain collinesca, ma suenter il 16 croda la retscha nusch giu vers ils funds dal 19. Ed uschia vinavant.

**M**ia muntogna russa da cifras sto avair impressiunà l'enconuschenta, pertge dapi là ma salida ella adina cun in «guarda qua, noss sinesteticher!» Ed jau scurlatt il chau, relativesch mias magras experientschas en chaussa, e menziun perencunter la giuvna chantanta turitgaisa Lea Lu che sa senta per exempel cumpletamain fonsada en color cotschna cur ch'ella intunescha ina chanzun en A

dur. Quai bain, quai è ina vaira sinestetista.

**N**a, colurs na vesa strusch en connex cun singuls tuns. Ma sch'ins cumbinescha plirs bustabs, il pli gugent cun in u plirs P's, lura bain, lura ma cumparan magari tschertas tempras coloradas. Exempels? In P e dus S evocheschan tar mai ina color cotschna, na, betg il cotschen dal solit sdratsch u bategl, plitost il cotschen da la bandiera svizra. Tar in P ed in C ed in D ves jau oransch cun strivlas lavinalas nairas. In P ed in L ed in D dattan quai che mes bab scheva «color de can che scappa». E lura exista anc ina cumbinaziun tut speziala, là veggnan ils prads tut brins, brins sco la puschna bittada en fatscha als adversaris. As spargn quella sapientivamain, ed as propon perencunter ina cumbinaziun tut nova, ella sa cumpona dad O, W ed S, u magari er dad O, P e P, e lascha resplescher, tut tenor sensibilitad interna, l'entir spectrum da l'artg, cotschen, mellen, verd, blau, violet. L'apoteosa da la sinestesia.